

Powšitkowne WOZJEWJENJA

swjatkowničku, njedźelu, 5. junija 2022

Wusyłanje Božej mše hižo prjedy

Serbskorěčnu Božu mšu móža wěriwi tutu njedźelu, swjatkowničku, 5. junija, w 9 hodź. z Chrósćic jako livestream sčehować. Link na nju je w interneće pod www.posol.de a na wosadneje stronje podaty.

Wulět samostejacych

Wulět samostejacych ze serbskich wosadow budže wutoru, 21. junija, a powjedže do Wechselburga. Zajimcy njech so hač do pónđzele, 13. junija, w redakciji Katolskeho Posoła přizjewja, telefonowe čisło (0 35 91) 55 02 12. Časy wotjězda busa z jednotlivych wsow so njedźelu do wulěta w Posole wozjewja.

Kemše na Bože čěło

Na swjedženju Božeho čěła, štwórtk, 16. junija, budu w Róžeńce kemše w serbskej rěči. Wone zahaja so w 19 hodź.

Předstajenje oratorija „Podlěčo“

Cyrkwinski chór Lubijsko-Žitawskeje eforije a chór Budyšin předstajitej pod nawodom cyrkwinskeho hudźbneho direktora Christiana Kühne z Lubija trójce oratorij „Podlěčo“. Prěnje předstajenje budže njedźelu, 12. junija, w 14.30 hodź. we wobłuku cyrkwinskeho dnja w Bukecach. Dalšej koncertaj sčehujetej sobotu, 2. julija, w 17.00 hodź. w Ketlicach a njedźelu, 3. julija, w 19.00 hodź. w Žitawje.

Do Medźugorja hišće swobodne městna

Za putnisku jězbu wot soboty do soboty, 22. do 29. oktobra, do Medźugorja su hišće přizjewjenja móžne. Tute přijimuje Gerat Róbl w Smjerdžacej, telefonowe čisło (03 57 96) 9 65 40.

Ministrantska kopańca

Koparski turněr ministrantow ze serbskich wosadow budže sobotu, 9. julija, w Pěskecach. Započatk je w 9.00 hodź. z Božej mšu we wjesnej kapałce.

Pytaja hladarku abo hladarja

Hornjołužiski zwjazk Carity z.t. pyta za ambulantnu službu w Kamjencu bórzomnje hladarku abo hladarja. Tydženski džělowy čas wučinja 30 hodźin. Požadanja přijimuja z mejlku na s.scholz@caritas-oberlausitz.de. Nadrobniše informacije poda nawodnica hladanskeho teama Sylvia Scholz, telefonowe čisło (03 59 1) 49 82 88.

Na pasion do Awstriskeje

Na busowu jězbu k pasionskim hram w Steinbruchu St. Margarethen w Awstriskej přepróšuje Radworske Šmitec busowe wozydłownistwo wot soboty do srjedy, 11. do 15. junija. Přizjewjenja přijimuju w Radworju, telefonowe čisło (03 59 35) 28 60.

Putniska jězba do Kölna a wokoliny

Na serbsku busowu jězbu z duchownym přewodom wot njedzele do štwórtka, 9. do 13. oktobra, přepróšuje Radworske Šmitec busowe wozydłownistwo. Z Königswintera wuchadžejo wopytaja Köln, Bonn, klóšter Steinfeld a dadža so wot Eifelskeje krajiny nad Rynom zakuzlać. Přizjewjenja přijimuje Šmitec wozydłownistwo, telefonowe čisło (03 59 35) 28 60. *farar Gerat Wornar*

Filmowe rozpominanje

Pod hesłom „Wěšće, rozsud swědomja, radikalnje – ludžo w rozsudže“ přepróšuje Smochčanske kubłanišćo swjateho Bena wot srjedy do njedzele, 22. do 26. junija, na dny rozpominanja z filmom. Přizjewjenja přijimuju hač do njedzele, 12. junija. Link z nadrobnjšimi informacijemi je pod www.posol.de wozjewjeny.

Łužica pomha Ukrainje

Towarstwo Cyrila a Metoda z.t. (TCM) hromadži ze swojej akciju „Łužica pomha“ dale pjenježne dary za ukrajskich čěkancow w Pólskej, kotrež dóstanje Caritas w Elku. Jeje direktor a dołholětny partner TCM, prelat dr. Dariusz Kruczyński, je zwuraznił, zo pomhaja jim najbóle pjenježne dary. Trěbne twory za čěkancow tam kupja. Wot měrca je TCM Carice w Elku 37.000 eurow přepokazało. Štóž chcył domapytanu ludnosć podpěrać, njech přepokaza pjenjezy na konto: Cyrill-Methodius-Verein e.V., IBAN: DE 65 7509 0300 0008 2823 66, hesło: „Ukraina“. Štóž sej darowansku kwitowanku přeje, měł swoju adresu podać. Za dotalne dary wustaja so kwitowanki hač do kónca meje.

Biskopstwowe chórowe putnikowanje

Cecilijowy zwjazk w Drježdžansko-Mišnjanskim biskopstwje přepróšuje wšitkich spěwarjow chórow kaž tež hlowno- a čestnohamtskich cyrkwinskih hudźbnikow na lětuše biskopstwowe chórowe putnikowanje. Jězba pod hesłom „Jubilate Deo omnes cantores – Wy spěwarjo wšitcy, chwalće Knjeza“ je planowana wot štwórtka do pónđzele, 29. septembra do 3. oktobra, do Triera a wokoliny.

Zo móhło so zhromadne spěwanje tež derje radzić, su regionalne probowe dny planowane. Wone wotměja so mjez druhim sobotu, 25. junija, wot 9.30 do 12.30 hodź., w centrumje wosady swjateho Pětra w Drježdžanach-Strěžinje a sobotu, 10. septembra, wot 9.30 do 12.30 hodź., w centrumje wosady Swjateje swójby w Drježdžanach-Zschachwitzu. Přizjewjenja přijimujeta regionalny kantor Stephan Thamm, z mailku na regionalkantordresden@bddmei.de abo cyrkwinski hudźbnik Marco Gulde pod adresu marco.gulde@pfarrei-bdmei.de. Za proby trjebaja wobdźělnicy chórowy zešiwk, kotryž dóstanu wot chórowych nawodow abo pola diakona Matthiasa Taucherta, docpějomy pod mailowej adresu matthias.tauchert@pfarrei-bddmei.de